

Prome barco di carga a drenta waf di carga na Barcadera



ORANJESTAD (AAN)

— Ayera waf di carga na Barcadera a ricibi su prome barco. Pa e motibo aki Minister encarga cu Asuntonan Economico, inf. Mike de Meza, a bishita e instalacion nobo pa mira con tur trabao ta andando, practicamente finalizando. E mandatario ta encarga tambe cu e companianan di utilidad y haf.

Ya caba a cuminsa pa test con e haf aki lo opera y tur cos a resulta positivo te aworaki. E mandatario a expresa di ta sumamente contento pasobra na 2009 ora cu Gabinete Mike Eman I a drenta gobernacion, esaki tabata un di e prioridadnan di Prome Minister Eman pa loke ta proyectonan cu kier bini cune.

E proceso a encera basta negociacion entre e dos partnernan cu a traha mas cu 25 aa cu otro. Pero na mesa a logra yega na un areglo, despues di a trata di busca mas interesado. Na final ASTEC y APA hunto a realisa e proyecto aki cu a bira realidad despues cu diferente Gobierno a bin ta papiando riba esaki pa mas di 30 aña. “Gabinete Mike Eman I y II a muestra asina cu nan ta Gabinete cu ta ehecuta proyectonan,” el a bisa y asina a duna ehempel di otro proyectonan manera renobacion y ampliacion di hospital, e caminda di 4 via cu ta den construccion, y diferente otro mas.

Minister de Meza a splica cu den luna di maart lo tin un “Open Dag” pa pueblo di Aruba y alabes lo tin e apertura oficial di e proyecto Tur e partnernan di APA y ASTEC y pueblo di Aruba por mira con bunita e proyecto a keda. E ta algo cu a wordo

spera pa hopi tempo y ta dedica na e politiconan cu a soña cu algo asina. “Nos ta sumamente orguyoso di mira e movecion aki riba. Esaki ta bay bira e curason di Aruba su economia,” de Meza a expresa. Y e ta keda banda di e haf aereo di Aruba.

E mandatario den combersacion cu director di APA a scucha cu tin diferente inversionista, tanto local como for di exterior, cu ta haciendo bishita na e haf nobo na Barcadera pa mira pa nan mes con e haf ta moviendo. Nan ta impresiona con e plan ta bayendo segun manera a wordo programa y kier sa di e posibilidadnan pa traha hunto cu e dos companianan, principalmente



den e pensamiento cu e haf ta un hub pa cu Caribe. Esaki ta danki na e economia di conocemento cu Aruba a bin ta trahando riba dje.

Awor APA por sigui cu su plannan cu institucionnan internacional pa yega na relacionnan comercial y no-comercial cu lo por nifica comercio pa Aruba. Esaki lo



sigui traha riba nan pa trece mas movecion pa pais Aruba. Mientrastanto Douane ya caba ta ubica na Barcadera y nan facilidadnan ta den preparacion, mescos cu esun

di inmigracion. Pues tur loke cu tin normal na cualkier haf, lo tin esaki tambe na Barcadera, e mandatario a expresa.

Un di e prioridadnan importante di Gabinete Mike Eman a keda completa

ORANJESTAD(AAN): Un dia cu a spera cu hopi anticipacion, cu a traha hopi duro pa yega y cu esnan responsabel ta ricibi finalmente cu hopi satisfaccion y orguyo. Traslado di e operacion di carga di waf pa e waf nobo na Barcadera a keda completa diamars mainta, ora cu e prome dos barconan di carga a drenta waf y procesa. Minister di Asuntonan Economico, Ing. Mike de Meza a haci un inspeccion personal pa mira di cerca con e mudamento a bay y e operacion ta andando. Cu awe tin un Waf di carga nobo na Barcadera, ta danki na e prioridadnan cu Gabinete Mike Eman I a pone su dilanti na 2009. Pa decadan largo a papia tocante mudamento di e operacionnan di carga for di Oranjestad pa asina por duna e industria di crucero turistico espacion a desaroya mas ainda. E dos operacionnan, esun di carga y esun di crucero no tabata duna e espacio pa nan por desaroya. Awo cu e waf di carga na Barcadera ta den operacion, Aruba a logra un otro meta den su desaroyo economico. Minister di Economia, ing. Mike de Meza a haya un recorrido di e waf nobo na Barcadera for di director di ASTEC, Sr. Mike de L'Isle den compania di director di APA, Ing. Jossy Figaroa. Despues di esaki de Meza a expresa den palabra e momento grandi cu esaki ta nifica pa pais Aruba y su futuro. "Nos ta mira aki un waf cu hopi Gobierno a papia di dje, pero ta e gabinete aki a bin y ehecuta



e proyectonan pa necesario y sumamente importante pa nos hiba Aruba na e siguiente pa cu nos economia." E prome impresion cu ta haya ora ta yega na waf di Barcadera ta cu finalmente pais Aruba tin e waf di carga cu e merece di tin. Rapidamente ta wak e diferencia enorme for di loke tabatin prome riba e tereno aki y con e infraestructura nobo ta esun cu mester tin pa atende e importacion y exportacion di un nacion. Entrada pa e trucknan tin su debido punto di seguridad, cu e edificio di ASTEC na banda pa atende tur aspecto di operacion, parkeo, etc. E grua ta resalta for di leu y e espacio paden ta suficiente amplio pa acomoda e cantidad di container cu Aruba ta ricibi awendia y pa por lo menos e proximo 50 aña. "Ya e prome barco a drenta caba y ya nan ta test e operacion; tur cos ta canando bon aworaki," asina Minister de Meza a bisa. E mandatario a recorda y resumi a trayecto tras di lomba cu elogio pa tur esnan involvi y e dedicacion hinca den e proyecto. "Nos ta hopi contento pasobra na 2009 ora Gabinete Mike Eman I a

drenta den gobernacion, esaki tabata un di e prioridadnan cu Prome Minister tabatin riba su lista di prioridad di proyecto," e titular encarga di empresanan estatal manera Aruba Ports Authority, a indica.

Despues di hopi deliberacion y negociacion, a yega na e decision cu ASTEC, cu kende APA tin mas di 25 aña ta traha caba, ta e compania mas indica pa forma parti di e proyecto. E decision aki a produci un resultado positivo. Ta canando segun schedule y dentro di e presupuesto, algo cu te hasta e paisnan di mas grandi dificilmente por logra, y na Aruba ta danki na un tremendo trabou den ekipo.

"APA ta doño como e Autoridad di Puerto Maritimo y ASTEC ta e operador. Tur actividad riba e waf nobo di Barcadera ta bou supervision directo di ASTEC y riba dje e supervision di Aruba Ports Authority N.V.," manera Minister di Meza a splica. Departamento di Douane como tambe Inmigracion tambe ta riba e tereno eherciendo nan funcion.